



LE COIN DU PATOIS

ZEF à MÉLANIE



LA PARTIE DE PÊCHE INTERROMPUE...

— Acoute in tiot peu ichi Mélanie, que j' te raconte eune savoureuse...

— T'as cor fait eune bêtise !...
— Cha y est, tout d' suite Madame, elle pinse à mal. Non, j'ai pas cor fait eune bêtise. Ch'est pas d' mi qui s'agit dins ch' l'histoire...

— Ah bon ! Et d' qui, hein ?...
— De ch' gros Léon avec Flavie...

— Ah ! chez deux la, y sont toudis in bisbise. Ch'étot bin la peine qu'y fassent un mariache à s'épates. Six mois après, y s' disputotent déjà comme des sauves.

— Acoute, Mélanie, te d'vros pas t'occuper ainsin de l' vie privée d' ches gins. Y s' disputent, cha s' peut ; mais in tout cas, d'puis d' trinte ans qui sont mariés, y sont toudis insimle. Undis que ch' grind Casimir et...

— Cha va ! cha va !... Te dis d' pas s'occuper de l' vie privée des autes et pis te vas commincher à dégolser sur ch' grind Casimir.

— Ah cha ! Ti, te vas l' défindre, bin sûr. Si te cros que j' sais pas qu' dins l' timsa t'avos un tiot faible pour li, te t' trompes.

— Bon, cha va, j' te dis ! Al-lons pas pus long d'su ch' terrain là. In va cor s' chamailier pour rin. Dis-me plutôt t'n' histoire savoureuse su ch' gros Léon.

— Eh bin, v'la. Y étot parti à l' péque pou' l' journée, avec Nestor à ch' large d' Périn. Au bout d'eune heure passée y z'avoient même pas cor eu eune touche.

— Eune touche !... Y minqu'ros plus qu' cha à léu ache !

— Mais non, pas eune touche, comme te cros. Cha mordot pas, si te préfères. Ach' pichon, y voulot rin savoir pour faire l' connaissance de l' poêle à frire.

— Ah bon, et après ?
— Cha fait qui a Nestor qui dit à Léon : « Mi j' comminche par m'imbéter ichi. Viens, in va aller boire eune chope mon Victor ». Victor, ch'est ch' café du cin...

— Cha, j' min doute, va !
— Les vià partis chez Victor. Bin intindu, y rincontrent là pas mal d' camarates...

— Oual, comme ti, quind cha l'arrive.

— Parfalt'mint, cha peut arriver, cha.

— Oual, et alors y'la ch' gros Léon et Nestor qui bolvent eune chope, pis deux, pis tros et pis finalmint qui prennent eune bonne tiote cuite.

— Ma ! comme t'es intelligente tout d' même ! Ch'est justemint cha.

— Si le gros qu' ch'est dur à d'viner ! T'aros bin fait l' troisième mousquetaire ti, si te t' avos trouvé avec eus.

— Allez... allez... comminche pas à vouloir m' vexer. Acoute plutôt la suite. Donc, eune idée, elle germe dins l' tête de ch' gros Léon. Y d'minde à Victor d' li prêter s' plau d'ours. Te sais ch'elle

belle plau de ch' l' ours brun qui dit qu'il a tué eune fos...

— Oual, et alors ?

— Alors, qui dit ch' gros Léon à Nestor, te vas t'affubler avec et pis in va aller faire peur à Flavie. Elle va croire que ch'est un Martien... Bravo ! qui répond Nestor, in va bin rigoler. Et les v'la partis tous deux ch' gros Léon in éclaircur. Nestor par derrière affublé d' chelle plau.

— Ah ! ch'est fin, cha !...

— Mais laiche finir, donc... V'la donc qu'y s'arrivent chez Flavie. Nestor y escalade ch' tiot mur de ch' gardin pou pénétrer dins l' cour. Y frappe à l' porte. Pas d' réponse. Flavie alle étot partie in courses.

— Ch'est bin fait ! Comme cha, tout y a été loupé. In a pas idée d' des jeux ainsin.

— Ah ! Te cros qu' ch'étot loupé !... Cha comminchoit seulmint. Ch'est qu' quint Nestor y a grimpe d'sur ch' mur, y a ch' voisin qui l'a vu, te sais, Carlos, ch'li qui est marié avec Zélie. Li y a été effrayé in véyant cha. Y a vralmint cru qu' ch'étot un Martien ou eune bête échappée.

— Forchémint avec toutes ches histoires qu'in raconte in ch' momint !

— Oual... Alors y a donné l'alarme à tout ch' quartier et quind min Nestor qui est réapparu in haut de ch' mur, y avot la toute eune armée pour l'attendre. Y a pas pu placher eune parole. Y z'ont cominché à querir d'sus li avec des bâtons, des fourches et autes outils. Nestor y courrot, y courrot. Mais y a Jules, te sais ch'ti qui est pas cor marié... qui a réussi à l' rattraper et qui lui a plinté les dints de s' fourche in pin du que j' pinse. Nestor, bin intindu, y s'a écroulé. Alors, y z'ont tous sauté su li, y l'ont à moitié estourbi, puis y l'ont conduit à l' gendarmerie. Là, te pinces de l' tête d' tout l' monde quind min pauvre Nestor y a inl'vé s' plau. Ah ! y étot bin arrangé, te sais ! Y peut pus s'asseoir, l' malheureux avec l' coup d' fourche d' Jules.

— Ah bin, cha ch'est pas mal alors !... Mais ch' gros Léon pin-dint ce temps, qu'est-ce qui est d'venu ?

— Y'a été transféré à l'hôpital.

— Hein !... bin pourquoi ? Y étot pas poursuivi li !...

— Non, mais quind s' femme, Flavie, qu'elle a su qu' ch'étot li qui avot tout mangancé, elle y a donné eune telle talouille que ch' pauvre Léon y'a dû être conduit à l'hôpital avec les yeux vus pochés et sin tiot dogt cassé.

— Te vas qu' j'ai raison quind j' te dis qu'y s'intindent pas tous les deux. In tous cas, pour eune partie d' pêche ch'étot réussi. Enfin y n'ara toudis qui de ch' coup là y sauront pus vive in paix... ch'est toudis cha...

— Et qui donc ?

— Bin, les pichons, tiens, pardi.